

Evening Dogri (NSD) Bulletin 27-04-2024

आकाशवाणी

खास खबर.

- 1 लोकसभा चुनां दे दुए गेड़ दे कामयाबी कन्नै तोड़ चढ़ी जाने परैत हून त्रीए गेड़ लेई प्रचार तेज।
- 2 बीजेपी दे वरिष्ठ लीडर अमित शाह होरें भरोसा जताया ऐ जे भारत तौले गै दुनिया दी त्रीह सब्बने शा बड्डी अर्थबवस्था बनी जाग। कांग्रेस नेता प्रियंका गांधी होरें बीजेपी पर समाज दे कमजोर तबकें कन्नै बेन्याई करने दा दोष लाया।
- 3 केन्द्र सरकारै बंगलादेश, संयुक्त अरब अमिरात, भूटान, बैहरीन, मॉरिशियस ते श्रीलंका—इनें 6एं मुखें गी 99 जहार मीट्रिक टन थमां मते गंडे दे निर्यात दी खुल्ल देई दित्ती।
- 4 तीरंदाजी विश्व कप दे स्टेज इक च भारत नै सुन्ने दे त्रै तगमे हासल कीते न।
- 5 मोसम विभाग नै औंदे 5एं दिनें दरान मुखै दे दक्खन—पूर्व दे केई राज्यें च तेज गर्मी पौने दे असार दस्से न।



Campaigning

कल लोकसभा चुनां दे दुए गेड़ तैहत मतदान दे पूरी चाल्ली रमानदारी ते बवस्था आले ढंगे सिर तोड़ चढ़ी जाने दे बाद हुन औंदे गेड़ दे मतदान लेई प्रचार च होर मती तेजी आई गई ऐ। सब्बै पार्टियां रैलियां ते रोड शो करियै मते शा मते मतदाताएं गी अपने पक्खै च करने लेई अपनी पूरी टिल्ल ला करदे न। लोकसभा

चुनां 2024 दे त्रीए गेड़ दा मतदान 7 मई गी होग जदू 12 राज्यें ते केन्द्र शासत प्रदेश च फैली दिएं कुल 94 सीटें लेई मतदान होग।

<><><><><><>

Shah-370-Priyanka

बीजेपी दे वरिष्ठ नेता अमित शाह होरें इस गल्लै पर भरोसा जताया ऐ जे प्रधानमंत्री नरेन्द्र मोदी हुंदे त्रीए कार्यकाल दरान भारत दुनिया दी त्रीह बड्डी अर्थबवसी च शामिल होई जाग। अज्ज गुजरात दे पोरबंदर च इक जनसभा गी संबोधत करदे होई अमित शाह होरें 370 गी हटाने, राम मंदर गी बनाने ते आतंकवाद ते नक्सलवाद दे खतरें थमां सफलता कन्नै निबड़ने जनेह ऐतिहासक फैसले लेई प्रधानमंत्री होरें गी एहदा श्रेय दित्ता ऐ। उनें कांग्रेस पार्टी दी अलोचना कीती जे ओह बंड पोआने बाली नीतियां ते वोट बैंक दी सियासत करा'रदे न। दूई बक्खी कांग्रेस दी महासचिव प्रियंका गांधी होरें अज्ज वलसाद जिले दे धर्मपुर च इक रैली गी संबोधत कीता, जित्थें उनें बीजेपी सरकार दी नुक्ताचीनी कीती जेहड़ी पिछले 10एं ब'रें थमां गरीब ते जनजातीय समुदाय दे लोकें कन्नै बेन्याई करा'रदी ऐ। उनें आक्खेआ ऐ जेकर कांग्रेस पार्टी सत्ता च औंदी ऐ ते ओह जनजातीय समुदाय दे लोकें लेई इक खास बजट तैआर करोग ते गरीबें, दबोए-लतड़ोए दे लोकें ते करसानें दी भलाई बेह्तरी आस्तै कम्म करोग।

<><><><><><>

BJP-Sikh

दिल्ली सिक्ख गुरुद्वारा प्रबंधक कमेटी दे केई मिंबर अज्ज बीजेपी दे मिंबर दे तौरा पर पार्टी च शामिल होई गे। इस मौके पर पार्टी महासचिव तरुण चुग, पार्टी लीडर मंजिंदर सिंह सिरसा ते बीजेपी दे प्रदेश अध्यक्ष वीरेन्द्र सचदेवा बी मजूद हे। कार्यक्रम दी सदारत करदे होई पार्टी दे राष्ट्रीय प्रधान जे.पी.नड्डा होरें आक्खेआ जे भारत दी एकता, अखंडता ते सुरक्षा गी जकीनी बनाना बीजेपी दा

पैहला मकसद ऐ ते सिक्ख समुदाय दा भारत दी ऑन बॉन शॉन दी राखी करने च इतिहास च मजूदा समें च ते भविक्ख च बी महत्वपूर्ण योगदान रौहग। उनें आक्खेआ जे प्रधानमंत्री नरेन्द्र मोदी होरें सिक्ख समुदाय दी भलाई बेहतरी ते खुशहाली लेई मता किश कीता ऐ। उनें आक्खेआ जे सिक्ख समुदाय नै मुल्खै गी विदेशी हमलावरें कोला बचाने ते जंगें च बी जित्त हासल करने च सदा गै बड़ा महत्वपूर्ण योगदान दित्ता ऐ।

<><><><><><>

BJP List

भारतीय जनता पार्टी नै लोकसभा चुनां लेई उत्तर मध्य मुंबई दी सीट पर वरिष्ठ वकील उज्जवल निकम होरें गी अपना मेदवार बनाया ऐ। इस सीट थमां पूनम महाजन बीजेपी दियां मजूदा सांसद न। बीजेपी नै ओडिशा विधानसभा चुनां लेई 8 मेदवारें दी लिस्ट जारी कीती ऐ। पार्टी नै केन्द्रपाड़ा विधानसभा सीट पर गीतांजली सेठी ते हिंडोल सीट पर सीमा रानी नायक गी मदान च तोआरेआ ऐ। इंदे इलावा तेलकोई सीट पर डॉ. फकीर मोहन नाथक ते खुर्दा सीट पर प्रशांता कुमार जगदेव बीजेपी दे मेदवार बनाए गे न।

<><><><><><>

Kharge-Barpeta

कांग्रेस पार्टी दे राष्ट्रीय अध्यक्ष मल्लिकार्जुन खड़गे होरें भरोसा जताया ऐ जे जेकर उंदी पार्टी सत्ता च औंदी ऐ तां ओह महिलाएं गी इक लक्ख रपेया नकद देग ते केन्द्र सरकार दिएं नौकरिं च 50 फीसद आरक्षण दित्ता जाग। अज्ज असम दे बारपेटा जिले च कोयाकुच्ची च इक रैली गी संबोधत करदे होई उनें आक्खेआ जे कांग्रेस पार्टी नोजवानें गी सिखलाई देने लेई 1 लक्ख रपेया उपलब्ध कराने दे कन्नोकन्नी 30 लक्ख नौकरियां बी देग।

<><><><><><>

Centre Onion

केन्द्र सरकारै बंगलादेश, संयुक्त अरब अमिरात, भूटान, बैहरीन, मॉरिशियस ते श्रीलंका—इनें 6एं मुल्खें गी 99 ज्हार मीट्रिक टन थमां मते गंडे दे निर्यात दी खुल्ल देई दित्ती ऐ। सरकारै पच्छम एशिया ते किश यूरोपी मुल्खें च निर्यात बजारें लेई खास तौर पर उगाए गेदे 2 ज्हार मीट्रिक टन चिट्टे गंडें दे निर्यात दी मंजूरी बी दित्ती ऐ। पिछले ब'रे दिसम्बर म्हीने सरकारै गंडे दे निर्यात पर रोक लाई दित्ती ही तां जे घरेलू स्तर पर इंदी सुद्दी मात्रा च उपलब्धता जकीनी बनी सकै। एह फैसला 2023—24 ब'रे च हाड़ी ते सोनी फसलें दी घट्ट पैदावरी दे अंदाजे दी पच्छोकड़ च लैता गेआ हा। उपभोक्ता मामले सरबंधी मंत्रालय नै आक्खेआ ऐ जे भए गी स्थिर रखने सरबंधी कोष दे तैहत 2024 दी हाड़ी रूतै थमांगंडें दी बफ्फर खरीद दा लक्ष्य इस ब'रे 5 लक्ख टन तैह कीता गेदा ऐ। भारत दी राश्ट्रीय सहकारिता उपभोक्ता फेडरेशन लिमिटेड ते नाफेड जनेई केन्द्री एजेंसियां खरीद ते भंडारन च सैहयोग लेई मकामी एजेंसिएं कन्ने समझौता करै करदियां न।



Archery World Cup

शंघाई च चलै'रदे तीरंदाजी विश्व कप च भारत दी ज्योति सुरेखा वेन्नम, दिती गोपीचंद स्वामी ते प्रणीत कौर नै महिलाएं दे फाइनल मकाबले च इटली गी 236—225 कन्नै हराइयै सुन्ने दा तगमा जित्ती लैता ऐ। भारतीय महिला टीम नै शडे चंद अंक मोआइयै दुनिया दी 6में नंबर दे इटली गी हराया। ज्योति सुरेखा वेन्नम ते अभिषेक वर्मा दी जोड़ी नै मिक्सड टीम गोलड फाइनल च एस्टोनिया गी हराइयै सुन्ने दा त्रिया तगमा जित्तेआ। अभिषेक वर्मा, प्रियांश ते प्रथमेश फुगे दी मर्दे दी टीम नै नीदरलैंड गी फाइनल च हराइयै सुन्ने दा तगमा हासल कीता। अज्ज गै मगरा सैमीफाइनल च मर्दे दे वर्ग च प्रियांश आट्रिया नै नीको वीनर कोला हारी गेआ ते उसी चांदी दे तगमे कन्नै संदोख करना पेआ।



Rev. IMD

भारतीय मौसम विभाग नै अगले 5एं दिनें दरान मुल्खै दे पूर्वी ते दक्खनी इलाकें च तेज लूह चलने दी पेशगोई कीती ऐ। पच्छम बंगाल दे गंगा तट कन्ने लगदे ते उप-हिमालयाई क्षेत्रें ते ओडिशा दे किश हिस्सें च निग्गर गर्मी पोने दी शँका जताई गेदी ऐ। बिहार, झारखंड, कर्नाटक, तमिलनाडू, केरल ते आंध्रप्रदेश दे समुंद्रै कन्नै लगदे इलाकें च बी लूह चलने दे आसार दस्से गे न। मौसम विभाग नै आक्खेआ ऐ जे मुल्खै दे पूर्वी ते दक्खनी हिस्सें ते महाराष्ट्र च बद्धोबद्ध तापमान 2 कोला 3 डिग्री बधी सकदा ऐ। मैहकमे दा आक्खना ऐ जे पूर्वोत्तर भारत च अगले चऊं दिनें च भारी बरखा बरने दी मेद दस्सी दी ऐ। जम्मू कश्मीर, लद्दाख, गिलगित, बल्तिस्तान, मुज्जुराबाद, हिमाचल प्रदेश ते उत्तराखंड च हल्के कोला दरमेयाने दर्जे दी बरखा ते बर्फबारी दी मेद दस्सी दी ऐ।



Highway/Weather

जम्मू ते एहदे कन्ने लगदे इलाकें सनें रियासी, उधमपुर, सांबा ते कठुआ जिलें च जंदी रातीं ते फही अज्ज बी होई दी बरखा करी तापमान च खरी मती मौसम ते पीर गी गली दे नेडे बर्फ किट्ठी होने गी दिक्खदे होई प्रशासन नै मूगल रोड पर गड्डिङ्गं दी आओजाई फिलहाल बंद करी दित्ती ऐ। तोआई दूई बक्खी जम्मू-श्रीनगर राष्ट्री जरनैली शिड़कै पर गड्डिङ्गं दी आओजाई बवस्था आले ढंगै सिर चलै करदी ऐ पर बनिहाल च छलवास दे नेडे शिड़कै पर तलैहट दे चलदे इस हिस्से थमां गड्डिङ्गं गी बल्लें-बल्लें अग्गे बधाय जा करदा ऐ। तोआई जम्मू च अज्ज बद्धोबद्ध तापमान 30 डिग्री सैल्सियस दर्ज कीता गेआ ऐ जिसलै के जंदी रातीं दा घट्टोघट्ट तापमान 19.3 डिग्री सैल्सियस हा।



World Veterinary Day

पशुएं दी चिकित्सा सरबंधी अज्ज कुल संसारी ध्याड़ा मनाया जा'रदा ऐ जिसी "वर्ल्ड वेटरिनरी डे" दे रूपै च हर ब'रे 27 अप्रैल गी मनाया जंदा ऐ। इस ध्याड़े गी मनाने दा मकसद समाज ते टकोहदा करियै पशुएं दी सेहत दिक्खभाल दे क्षेत्र च पशु चिकित्सकें दे महत्वै गी उजागर करना ऐ। इस ब'रे लेई इस ध्याड़े दा विषय ऐ "पशु चिकित्सक जरूरी सेहत कर्मी न"।

<><><><><><>

Japan Earthquake

जापान दे बोनिन टापुएं दे समूह आले इलाके च अज्ज दपैहरी मगरा इक जबरदस्त भूंचाल आया जेहदी तीव्रता रिक्टर पैमाने पर 6.9 मापी गई ऐ। भूंचाल दा केन्द्र दक्खनी टोक्यो कोला कोई पौने 9 किलोमीटर दे छिंडे पर पच्छमी तट दे टापुएं दे समूह च दस्सेआ गेआ ऐ। मध्य टोक्यो च बी इस भूंचाल दे हल्के झटके मसूस कीते गे। जापान दे मौसम विभाग मूजब एह भूंचाल दपैहरी मगरा 2 बज्जियै 36 मिंटे पर आया। भूंचाल दे कारण सुनामी दी चेतावनी उआं जारी नेई कीती गई ऐ ते नां गै अजें तोड़ी जान माल दे नुक्सान दी जानकारी हासल होई ऐ।

<><><><><><>